

Félic Gil del Cacho

(Tramacastilla de Tena, 1924-Barcelona, 1986)

Autor d'o primer libro en aragonés tensino, vivió dica os 40 años en Tramacastilla y, como muitos chirmans solters de a montaña, se dedicó a aduyar a o mantenimiento de a suya casa en as fainas d'o campo y como pastor. Recorrió numerosas vezes as cabañeras entre a Val de Tena y a ribera d'o Ebro estando a suya vida representativa d'o carauter y a suerte de tantos montañeses que esperimenteron as penurias d'a posguerra y posteriormén a emigración. Asinas, marchó a Barcelona en 1965, treballando allí de taxista y de ordinanza en a Universitat. Estió allí an prenió conzenzia d'a valor de as suyas radizes, estimulau por romanistas y estudiosos d'o aragonés de Barcelona: estió por o suyo treballo en a universitat como conoxió a Enrique Gargallo Gil, con qui colaboró en cualques de as suyas clases de filolochía romanica dedicadas a la luenga aragonesa, y a Antoni Badía i Margarit. Posteriormén, en o transcurso de as suyas estancias en Tramacastilla, atrabó amistat con Miguel Martínez Tomey, a qui confiaría a edición d'o que sería o suyo único libro.

En as suyas conversazions con Martínez Tomey este replegó abundán material lexicografico d'o aragonés tensino y asinas como etnográfico (ditos, mazadas, cantas, leyendas, costumbres, etc.) quedando constanzia mosical de beluns de istos testimonios en dos álbuns de A Orquestina d'o Fabirol ("Suda, suda fabirol" y "Ronda tensina" de Me'n baxé ta tierra plana). Aparti de iste material os suyos únicos escritos en aragonés se limitan a la correspondencia que intercambió con Martínez Tomey y a un curto relato ("Alcordanzas de ra Balle Tena. O binatero Sarrablo") publicau en o nº 6 de a revista Orache (1985), abanze de lo que plegarían a estar os suyos *Recosiros de ra quiesta Balle Tena*, autobiografía y memorias de a suya vida en a val que, baixo ro titol de *O Tión*, publicó a Deputación Cheneral de Aragón a o año siguién de o suyo feneiximiento.

<http://www.lenguasdearagon.org//pdf/biografias/felisgil.pdf>

<http://www.lenguasdearagon.org/wp-content/uploads/2016/06/recosiros24.pdf>